



Komunikadu Imprensa
01 Juñu 2020

Komemorasaun Loron Internasionál Labarik

**JSMP husu Governu atu aseguira direitu labarik sira asesu ba justisa tantu iha
propagasaun Covid-19 no Estadu Emerjénsia**

Loron 01 Juñu kada tinan, mundu tomak inklui Timor-Leste komemora nu'udar loron internasionál ba labarik sira hodi rekoñese, aseguira, promove no respeita labarik sira nia direitu fundamentál sira. Labarik barak sofre violénsia, diskriminasaun no abuzu seksuál oi-oin iha rai bar-barak inklui Timor-Leste até iha situsaun pandemia Covid-19, labarik sira kontinua hetan violénsia.

Iha tinan 2019, JSMP monitoriza kazu violénsia doméstika no abuzu seksuál ne'ebé envolve labarik sira hamutuk 52 iha tribunál distritál sira hotu. Hosi númeru ne'e, krime ne'ebé aas liu mak krime abuzu seksuál ba menór hamutuk 24. Maibé númeru ne'e mós reprezenta deit prosesu sira ne'ebé JSMP observa iha tribunál sira no la inklui kazu hotu ne'ebé tribunál julga. JSMP fiar katak iha númeru barak liu ida ne'ebé la konsege lori to'o mai sistema justisa formal, tanba razaun oioin, hanesan falta koñesimentu kona-ba prosesu legál, limitasaun rekursu, no problema sosial sira seluk.

Entretantu iha situsaun pandemia Covid-19, tuir dadus ne'ebé JSMP hetan husi PNTL liuhusi VPU (Unidade ba Ema Vulneravel) iha Munisípiu Aileu, Same, Baukau no Oekusi husi fulan Janeiru-Abril 2020, VPU rejista kazu barak envolve kazu Violénsia Bazeia ba Jéneru hamutuk 81 ne'ebé mós inklui vítima labarik.

“JSMP preokupa tebes ho númeru violénsia hasoru labarik ne'ebé kontinua as iha tribunál sira. Situsaun ne'e bolu ita hotu nia atensaun liu-liu estadu atu fó prioridade as, kria polítika ida ne'ebé responsivu atu garante protesaun adekuada ba labarik sira nune'e labarik sira bele hetan tratamentu espesiál hodi goja sira nia direitu ho liberdade tuir protesaun ne'ebé konstituisaun fó ona”, dehan Ana Paula Marçal, Diretora Ezekutiva JSMP.

Artigu 18 Konstituisaun RDTL kona-ba protesaun ba labarik-oan sira define katak: (1) Labarik

sira iha direitu ba protesaun espesiál husi família, comunidade, no mós estadu, liu- liu hasoru hahalok hotu hanesan la tau-matan, diskriminasaun, violénsia, presaun, abuzu seksuál no explorasaun. (2) Labarik sira hetan direitu hotu-hotu ne'ebé mundu rekoñese, hanesan direitu sira-ne'ebé hakerek ona iha konvensaun internasionál, ne'ebé estadu aprova no simu ona ka ratifika filafila. (3) Labarik hotu-hotu ne'ebé moris iha kazamentu nia laran ka lae, iha direitu hanesan kona-ba protesaun sosiál.

Bazeia ba provizaun ne'e, ema hotu no estadu iha obrigasaun atu fó protesaun masímu ba labarik sira no tenki konsidera interese labarik as liu interese sira seluk. Tanba ne'e, JSMP nafatin ejize ba Parlamentu Nasionál, iha lejislatura ida ne'e atu fó prioridade atu halo alterasaun ba Kódigu Penál hodi hamosu artigu espesífiku kona-ba incestu sein haree ba idade no konsentimentu no mós tau iha prioridade ba Esbosu Lei Protesaun Labarik atu diskute no aprova.

JSMP hato'o parabens ba labarik sira iha mundu tomak, liu-liu labarik sira iha Timor-Leste no hein katak liuhosi komemorasaun lora mundiál ba labarik ne'e, ema hotu bele hamutuk luta kontra violénsia oioin no diskriminasaun hotu hasoru labarik tanba labarik sira mak futuru nasaun.

Atu hetan informasaun kompletu bele kontaktu:

Ana Paula Marçal

Diretóra Ezekutiva JSMP

Email: ana@jsmp.tl

Telefone: 3323883 | 77040735

Website: <http://jsmp.tl/>